

四庫全書

子部

欽定四庫全書

太平御覽卷一百十四

宋 李昉等 撰

皇王部三十九

唐憲宗章武皇帝

穆宗文惠皇帝

敬宗昭愍皇帝

憲宗章武皇帝

唐書曰憲宗章武皇帝諱純順宗長子母曰莊憲王太

后大曆十三年生於長安之東宮內六七歲時德宗抱
置膝上問曰汝誰子在吾懷對曰是第三天子德宗異
之貞元四年六月封廣陵王順宗即位之年四月冊為
皇太子八月己巳即皇帝位於宣政殿先是連月霖雨
是日晴霽人情忻悅丁未始御紫宸殿對百寮庚戌詔
曰朕以寡昧纂承洪業永思理本所寶惟賢至如嘉禾
神芝奇禽異獸蓋王化之虛美也所以光武形於詔令
春秋不書祥瑞朕誠德薄思及前人自今以後有祥瑞

有司不得上聞其珍禽竒獸亦宜停進冬十月壬申貶
中書侍郎同中書門下平章事韋執誼為崖州司馬以
交王叔文也元和元年春正月丙寅朔皇帝率羣臣於
興慶宮奉上太上皇尊號丁卯御含元殿受朝賀畢御
丹鳳樓大赦天下改元癸未詔以太上皇舊恙愆和親
侍藥膳權不聽政以高崇文檢校工部尚書充神策行
營節度使甲申太上皇崩乙酉宰相杜佑攝冢宰戊子
制曰劍南西川疆界素定藩鎮守備各有區分頃因元

臣亮謝隣藩不睦劉闢乃因虛構隙以忿結讎遂勞三軍魚害百姓朕志存含垢務欲安人遣使宣諭委之旄鉞比聞道路壅塞未息干戈輕肆攻圍擬圖吞併為君之體義在勝殘命將興師蓋非獲已宜令興元嚴礪東川李康倚角應接神策行營節度使高崇文神策兵馬使李元奕率步騎之師與東川元興之師類會進討甲午高崇文由斜谷路李元奕由駱谷路俱會於新潼關辛卯羣臣請聽政戊戌上謂宰臣曰前代帝王或怠於

聽政或躬覽繁務其道何如杜黃裳對曰帝王之修己
簡易擇賢委任不宜於怠肆安逸然事有綱領小大有
常務其遠者大者至如簿書獄訟百吏能否本非人主
所自任也但擇人委任責其成效賞罰必信誰不盡心
傳稱帝舜之德曰夫何為哉恭己正南面而已以能舉
十六相去四凶也豈與勞神疲體自任耳目之主同年
而語哉但人主之勢患在不能推誠人臣之弊患在不
能自竭由是上疑下詐禮貌或虧欲興治理自然難致

苟無此弊何患不至於理上稱善久之五月辛卯冊太
上皇后王氏為皇太后九月辛亥高崇文奏收成都擒
劉闢以獻癸丑以山人李渤為左拾遺徵不至二年春
正月上親朝獻太清宮御丹鳳樓大赦天下己酉以戶
部侍郎武元衡為門下侍郎同平章事以中書舍人翰
林學士李吉甫為中書侍郎同平章事二月庚午司天
造新厯成詔題為元和觀象厯九月庚申李錡據潤州
反殺判官王淡大將趙琦遂合蘇常湖杭睦等五州戍

將殺刺史脩石頭城欲謀僭逆癸酉潤州大將張子良
李奉仙等執李錡以獻十一月斬錡詔削屬籍十二月
戊辰上謂宰臣曰朕覽國書見文皇帝行事少有過差
諫臣論諍往復數四况朕之寡昧涉道未明今後事或
未當卿當每事十論不可一二而已己卯史官李吉甫
撰元和國計簿總天下方鎮凡四十八管州府二百九
十五縣一千四百五十三戶二百四十四萬二百五十
四其鳳翔廊方邠寧振武涇原銀夏靈鹽河東易定魏

博鎮冀范陽滄景淮西淄青十五道凡七十一州不申
戶口每歲賦入倚辦止於浙江東西宣歙淮南江西鄂
岳福建湖南等八道口四十九州一百四十四萬戶比
量天寶供稅之戶則四分有一天下兵戎仰給縣官者
八十三萬餘人比量天寶士馬則三分加一率以兩戶
資一兵其他水旱所損徵科發歛又在常役之外是歲
吐蕃回紇奚契丹渤海牂牁上音牁南詔並朝貢三年
下音歌
春正月癸巳羣臣上尊號曰睿聖文武皇帝御宣政殿

受冊禮畢御丹鳳樓大赦天下庚子涇原段祐請脩臨
涇城在涼州北九十里拒犬戎之衝要詔從之四年秋
七月御製前代君臣事迹十四篇書於六扇屏風是月
出書屏以示宰臣丁未渭南暴水壞廬舍二百餘戶口
溺死六百人命府司賑給八月安南都護張丹奏破瓌
王國三萬餘人獲戰象兵械并王子五十九人十月冊
鄧王寧為皇太子癸巳以冊儲肆赦繫囚死罪降徒流
以下遞降一等工部侍郎歸登給事中呂元膺為皇太

諸王侍讀五年八月乙亥上謂宰臣曰神仙之事信乎
李藩對曰神仙之說出於道家道家所宗老子五千文
為本老子指歸與六經無異前代好怪之流假托老子
為神仙之說故秦始皇遣方士載童男女入海求仙藥
漢武帝嫁女與方士求不死藥二主受惑卒無所得文
皇帝服胡僧長生藥遂致暴疾不救古詩曰服食求神
仙多為藥所誤誠哉言也君人者但務求理四海樂推
社稷延永自然長年也上深然之六年十一月乙丑制

以戶部侍郎李絳為中書侍郎同平章事十二月辛卯
皇太子寧薨謚曰惠昭七年五月上謂宰臣曰卿言吳
越去年水旱昨有御史自江淮回言不至為灾人不堪
困李絳對曰臣得兩浙淮南狀相繼言歟旱方隅授任
皆朝廷信重之臣御史非良或容希媚此當出姦佞之
口况推誠之道君人大本任大臣以事不可以小臣言
間之伏望明示御史姓名正之典刑上曰卿言是也朝
廷大體以恤人為本一方不稔即宜賑救濟其饑寒况

可疑之耶向者不思而有此問朕言過矣八年三月辛未上以久旱親於禁中祈雨是夜澍雨沾足六月庚寅京師大風雨毀屋飛瓦人多壓死溝瀆暴漲行人不通辛丑出宮人二百車任從所適以水災故也九年十月甲子制曰朕嗣膺寶位於茲十年每推至誠以御方夏庶以仁化臻於太和宵衣旰食意屬於此今淮西一道未承朝命擅自繼襲肆行寇掠將士等迫於受制非是本心思去三面之羅庶遵兩階之義宜以山南東道節

度使嚴綬兼充申光蔡等州招撫使十年正月嚴綬帥師次蔡州界己亥制削奪吳元濟官爵六月鎮州節度使王承宗遣盜夜伏靜安坊刺宰相武元衡死之刺御史中丞裴度傷首而免十二年五月唐鄧節度使李愬屢敗賊於吳房獲賊將李佑七月以裴度守門下侍郎同平章事充彰義軍節度申光蔡觀察處置等使仍充淮西宣慰使十月李愬率師入蔡州執吳元濟以獻淮西平十三年正月御含元殿受朝賀禮畢御丹鳳樓大

赦天下七月詔削奪淄青節度使李師道官爵仍令宣武魏博義成等五鎮之師分路進討十二月上謂宰相曰臣事君但力行善事自致公望何乃好樹朋黨朕甚惡之裴度對曰君子小人未有無徒者君子之徒同心同德小人之徒是朋是黨上曰他人之言亦與卿等相似豈易辨之哉度曰君子小人觀其所行當自區別矣上曰凡好事口說則易躬行則難卿等既言之須行之勿空口說度等謝曰陛下處分可謂至矣臣等敢不激

勵然天下之人從陛下所行不從陛下所言臣等亦願陛下每言之則行之上頗忻納十四年春正月以東師宿野不受朝賀三月上謂宰臣曰聽受之間大是難事推誠選任所謂委寄必合盡心及至所行臨事不無偏黨朕臨御以來歲月斯久雖不明不敏然漸見物情每於行為務欲詳審比令學士集前代昧政之事為辨諉略每欲披閱以為鑒戒耳崔羣對曰無情曲直辨之至易稍懷欺詐審之實難故孔子有衆好衆惡之論浸潤

膚受之說蓋以曖昧難辨故也若擇賢而任之待之以誠糾之以法則人自歸公孰敢行偽陛下詳觀載籍以廣聰明實天下幸甚七月羣臣上尊號曰元和聖文神武法天應道皇帝是日御宣政殿受冊御丹鳳樓大赦天下八月上謂宰臣曰天下事重不可一日曠廢若遇連假不坐有事即詣延英請對崔羣以殘暑方甚目同列將退上止之曰數日不見卿等時雖暑熱朕不為勞九月上謂宰相曰朕讀玄宗實錄見開元初銳意求理

至十六年以後稍似懈倦開元末又不及中年何也崔
羣對曰玄宗少歷民間身經屯難故即位之初知人疾
苦躬勤庶政加之姚崇宋璟蘇頌盧懷慎等守正之輔
孜孜獻納故致治平及後承平日久安於逸樂漸遠端
士而近小人宇文融以聚斂媚上心李林甫以姦邪惑
上意加之以國忠故及於亂願陛下以開元初為法以
天寶末為戒即社稷無疆之福也時皇甫鎛以諂刻欺
蔽在相位故羣因以止之上服方士柳泌金丹藥起居

舍人裴潏上表切諫以金石含酷烈之性加燒煉則火毒難制若金丹已成且令方士自服一年觀其效用則進御可也上怒貶潏為江陵令十五年春正月甲戌上以餅金丹小不豫罷元會庚子夕上崩於大明宮之中和殿享年四十三謚曰聖神章武孝皇帝廟號憲宗葬於景陵

穆宗文惠皇帝

唐書曰穆宗文惠皇帝諱恆憲宗第三子也母曰懿安

皇后郭氏貞元十一年七月生於大明宮之別殿初名
宥封建安郡王元和七年七月冊為皇太子改名恒十
五年正月憲宗崩閏月庚午即皇帝位於太極殿東序
戊申上見羣臣於紫宸門外辛亥以蕭俛段文昌為中
書侍郎同平章事上始御延英對宰臣二月辛丑御丹
鳳樓大赦天下壬寅勅舉賢良方正直言極諫科目人
宜令中書門下尚書省四品以上於尚書省同試三月
壬子召侍講學士韋處厚路隨於太液亭講毛詩關雎

尚書洪範等篇既罷並賜緋九月辛丑大合樂於魚藻宮觀競渡又召李愬李光顏入朝欲以重陽日宴羣臣拾遺李班上疏諫云元朔未改園陵尚新雖易月之期俯從人欲而三年之制猶服心喪夫過密施禁蓋為濟人合樂內庭事將未可不聽十月鎮州王承元以所部四州請命以魏博節度等使田弘正為鎮州節度使以承元改滑州節度使長慶元年正月己亥朔上親薦獻太清宮太廟是日法駕赴南郊日抱珥宰臣賀於前辛

丑祀昊天上帝於圜丘即日還宮御丹鳳樓大赦天下
改元長慶内外文武及致仕官三品以上賜爵一級三
月庚子上觀伎樂於麟德殿歡甚謂給事中丁公著曰
比聞外間公卿士庶時有歡宴蓋時和民安甚慰予心
公著對曰誠有此事然臣之偶見風俗如此亦不足嘉
百司庶務漸恐勞煩聖慮上曰何至於是對曰夫賓宴
之禮務達誠敬不繼以淫故詩人美樂且有儀而戒屢
舞前代名士良辰宴聚或清談賦詩投壺雅歌雖以杯

酌獻酌不至於亂國家自天寶以後風俗奢靡宴席以
誼譁沉湎為樂而居重位秉大權者優雜倨肆於公吏
之間曾無愧恥公私相効漸以成俗由是物務多廢獨
聖心求理安得不勞宸慮乎陛下宜頒訓令禁其過差
則天下幸甚時上荒於酒樂公著因對諷之頗深嘉納
三月幽州劉總請分割地土入朝公卿皆疑獨上推誠
納之以宣武節度使張弘靖為幽州節度使以總為鄆
州節度使秋七月壬子羣臣上尊號曰文武孝德皇帝

上受冊於宣政殿禮畢御丹鳳樓大赦天下甲寅幽州
監軍使秦軍亂囚節度使張弘靖於別館害判官韋雍
張宗元崔仲卿鄭損軍人取朱滔子洄為留後洄自以
年老令軍人立其子克融為留後八月乙巳鎮州監軍
宋惟澄奏軍亂節度使田弘正并家屬將佐三百餘口
並遇害軍人推衙將王庭湊為留後二年三月甲子詔
雪王庭湊仍授鎮州大都督長史充成德軍節度等使
三軍將士待之如初仍令韓愈往彼宣諭十月詔江淮

諸州旱損田苗頗多所在米價不免踴貴眷言疲瘵須
議優矜宜委淮南浙東浙西宣歙江西福建等道觀察
使各於當道有水旱處取常平義倉斛斗據時估減半
價糶以惠貧民十一月庚午命景王率禁軍百騎侍從
皇太后幸華清宮又幸石甕寺癸酉上幸華清宮迎皇
太后巡狩於驪山下即日馳還皇太后翌日方還庚辰
上與內官擊鞠禁中有內官歛然墜馬如物所擊上恐
罷鞠升殿遽足不能履地風眩就牀自是外不聞上起

居者三日十二月丁亥詔五坊鷹隼解放獵具並毀之
庚寅宰臣李逢吉率百寮至延英門請見上不許裴度
與諸大臣三上疏請立皇太子辛卯上於紫宸殿見百
寮李逢吉奏景王成長請立為皇太子左僕射裴度又
極言之癸巳詔立景王為皇太子丙午上御宣政殿冊
立皇太子受冊畢百寮謁太子於東宮三年正月丁巳
上以疾苦不受朝賀是日大風昏翳竟日四年正月辛
亥上御正殿受朝如常儀上餌金石之藥處士張皋上

疏切諫上悅召之求舉不獲卒未上大漸詔皇太子監國事壬申上崩於寢殿時年三十謚曰聖文惠孝皇帝廟號穆宗葬於光陵

敬宗昭愍皇帝

唐書曰敬宗昭愍皇帝諱湛穆宗長子母曰恭僖太后王氏元和四年六月七日生於東宮之別殿長慶元年封景王二年立為皇太子四年正月穆宗崩皇太子即位時年十六二月辛巳朔上衰服見羣臣於紫宸門外

癸未貶戶部侍郎李紳為端州司馬辛卯勅沒掖庭宮人先配內園宮人並宜放出任其所適己亥冊大行皇帝皇太后為太皇太后三月上御丹鳳樓大赦天下天下常貢之外不得進獻六宅十宅諸王女宜令每年於選人中選擇降嫁甲寅始於延英對宰臣甲子故山南東道節度使牛元翼家屬悉為王庭湊所害上惜其橫死傷悼久之仍歎宰執非才縱奸臣跋扈翰林學士韋處厚奏曰理亂之本非有他術順人則理違人則亂陛下

當食歎惜恨無蕭曹今有一裴度尚不能用此馮唐所以感悟漢文雖有頗牧不能用也戊辰羣臣入閣日高猶未坐有不任立而踣者諫議大夫李渤出次請御殿俄而始坐班退左拾遺劉栖楚極諫叩頭龍墀血流上為之動容丙申賊張韶等百餘人至右銀臺門殺奄者揮兵大呼進至清思殿登御榻而食弓箭庫左神策軍兵馬使康藝全率兵入宮討平之是日上聞變急幸左軍丁酉上還宮羣臣稱慶諫議大夫李渤以上輕易致

盜言甚激切五月制以吏部侍郎李程戶部侍郎竇易直並同中書門下平章事十二月回鶻吐蕃奚契丹遣使朝貢寶曆元年春正月辛亥親祀昊天上帝於南郊禮畢御丹鳳樓大赦改元二月桂管防禦觀察使李德裕獻丹宸箴六首上深嘉之命學士韋處厚優其答詔四月羣臣上徽號曰文武大聖廣孝皇帝御宣政殿受冊禮畢御丹鳳樓大赦天下七月甲申拾遺李漢舒元褒薛延老於閣內奏曰近日除授往往不由中書進擬

多是內中宣出臣恐紀綱寔壞奸邪恣行伏希詳察上
然之詔度支進銅三千斤金箔十萬翻脩清思院新殿
及昇陽殿二年五月幽州軍亂殺其帥朱克融及男延
齡軍人立其第三子延嗣為留後辛巳神策苑內古長
安城中脩漢未央宮掘池獲白玉牀長六尺六月減放
內苑役二千五百人帝性好土木自春至冬興作相繼
庚申鄆州進打毬人石定寬等四人辛酉幸凝碧池令
兵士千餘人於池中取大魚送入新池癸亥以旱命京

城諸司䟽理繫囚帝好深夜自捕狐狸宮中謂之打夜
狐十月辛丑帝夜獵還宮與中官劉克明田務澄許文
瑞打毬軍將蘇佐明王嘉憲石定寬等飲酒帝方醉入
室更衣殿燭忽滅劉克明等同謀害帝即時殂於室內
時年十八謚曰睿武昭愍孝皇帝廟號敬宗葬莊陵

太平御覽卷一百十四

欽定四庫全書

太平御覽卷一百十五

宋 李昉等 撰

皇王部四十

唐文宗昭獻皇帝

武宗昭肅皇帝

宣宗獻文皇帝

懿宗恭惠皇帝

文宗昭獻皇帝

唐書曰文宗昭獻皇帝諱昂穆宗第二子也母曰貞獻

皇后蕭氏元和四年十月十日生長慶元年封江王初名涵
寶曆二年十二月敬宗遇害賊蘇佐明等矯制立絳王
勻當軍國事樞密使王守澄中尉梁守謙率禁軍討賊
誅絳王迎上於江邸癸卯見宰臣於閣內下教處分軍
國事宰臣百寮三上表勸進乙巳即位於宣政殿丙午
上赴西宮成服丁未宰臣百寮上表請聽政三表許之
戊申尊聖后為皇太后乙酉勅鳳陽淮南先進女樂二
十四人並放歸本道庚戌以兵部侍郎翰林院學士韋

處厚為中書侍郎同中書門下平章事太和元年二月
乙巳御丹鳳樓大赦改元六月詔元和長慶中皆因用
兵權以濟事所下制勅難以通行宜令尚書省取元和
以來制勅參詳刪定訖送中書門下議定聞奏甲戌以
早放繫囚七月李同捷除兗海不受詔結幽鎮謀叛徐
州王智興請全軍討之帝自撰集尚書中君臣事迹命
畫工圖寫於太液亭朝夕觀覽三年五月己卯柏耆斬
李同捷於將陵滄景平丁亥御興安樓受滄州所獻俘

九月命諸司宦官不得著紗縠綾羅等衣裳帝性儉素不喜奢侈駙馬韋處仁著夾羅巾帝謂之曰朕慕卿門地清潔以之選尚如此巾服聽其他貴戚為之卿不須爾十一月甲子帝親祀昊天上帝於南郊禮畢御丹鳳樓大赦天下禁止奇貢四方不得以雜樣織成非常之物為獻十二月南詔蠻陷邛崃等州戊午以右領軍衛大將軍董重質充神策西川行營都知兵馬使蠻陷成都府入梓州西郭門下營又詔促諸鎮兵馬救援兩川乙

已躬劄奏蠻抽退遣使賜蠻帥蒙篔巔國信四年四月
詔曰儉以足用令出唯行著在前經斯為理本朕自
臨四海愍元元之困日昃食宵興疚懷雖絕文繡之
飾尚愧茅茨之儉示諭卿士形於詔條朕聞積習流弊
餘風未革車服第室相尚以華靡之制資用貨寶因啓
乎貪冒之源有司不禁侈俗滋扇益朕教導之未敷使
兆庶昧於恥尚也其何以足用行令臻於上理與永
念慚嘆迨茲申勅自今內外班列職位之士各務朴素

弘茲國化有借差甚者御史糾上主者宣示知朕意馬上承長慶寶歷奢靡之風銳意懲革躬行儉素以率厲之五年春正月庚子以積陰決旬罷元會太原旱賑粟十萬石二月神策中尉王守澄奏宰相宋中錫與漳王謀反即令追捕庚子詔貶宋中錫為太子右庶子壬寅左侍崔玄亮及諫官王質等四十人伏奏玉階北軍所告事請不於內中鞫問乞付法司帝曰吾謀於公卿矣卿等且退崔玄亮泣涕陳諫久之帝改容勞之曰朕即與宰

臣商議玄晃等方退癸卯詔漳王可降為巢縣公宋申
錫開州司馬同正初京師恟恟以宰相實驍親王謀反三
四日後方知誣構人士側目於守澄鄭注諫官號泣論
之申錫方免其禍六年春正月乙未朔以大雪廢元會
壬子詔曰朕聞天聽自我人聽天視自我人視朕之非
德涉道未明不能調序四時尊迎和氣自去冬以來踰
月雨雪寒氣尤甚頗傷於和念茲庶氓或罹凍餒無所
假貸莫能自存中宵載懷盱食興嘆怵惕若厲實予之

辜思弘惠澤以順時令天下死罪囚除官典犯賊故意
殺人外並降從流流以下遞降一等七年正月詔曰朕
承上天之眷佑荷列聖之丕圖宵旰憂勞不敢暇逸思
致康乂八年於茲而水旱流行疾疫作沴兆庶艱食札
瘥相仍益德未動天誠未感物一夫失所其過在予載
懷罪己之心深軫納溝之慮比聞關輔河東去年亢旱
秋稼不登今春作之時農務尤切若不能賑救懼至流
亡京兆府賑粟十萬石河中府絳州各賜七萬石同華

陝虢晉州各賜十萬石並以常平義倉物充給七月旱
命京城諸司疏決繫囚閏七月乙卯詔曰朕嗣守丕圖
覆嫗生類兢業寅畏上承天休而陰陽失和膏澤替候
害我稼穡災我黔黎有過在予敢忘咎責從今避正殿
減供膳停教坊樂廐馬量減芻粟百司厨饌亦宜權減
陰陽湮鬱有傷和氣宜出宮女千人五坊鷹犬量須減
放內外脩造事非急務者並停八月甲申御宣政殿冊
皇太子永是日降詔應犯死罪降從流流以下遞減一

等九年冬十月內出曲江新造紫雲樓綵霞亭額左軍中尉仇士良以百戲於銀臺迎之時鄭注言秦中有灾宜興土功以厭之乃濬昆明曲江二池上好為詩每誦杜甫曲江行云江頭宮殿鎖千門細柳新蒲為誰綠乃知天寶已前曲江四岸皆有行宮臺殿百司解署思復昇平故事故為樓殿以壯之王涯獻榷茶之利乃以涯為榷茶使茶之有稅自涯始十一月壬戌中尉仇士良率兵誅宰相王涯賈餗舒元興李訓王藩郭行餘鄭注

羅立言李孝本韓約等十餘家皆族誅時李訓鄭注謀
殺內官詐言金吾仗舍榴樹有甘露請上往觀之內官
先至金吾仗見幕下伏甲遽扶帝輦入內故訓等敗流
血塗地京師大駭旬日稍安十二月庚辰上御紫宸殿
謂宰相曰城市之間人漸安未李石奏曰人情雖安然
刑殺過多致此陰沴又聞鄭注在鳳翔募兵不少今皆
被刑戮臣恐乘此生事切宜原赦以安之上曰然鄭覃
又陳理道上曰我每思貞觀開元之時觀今日之事往

往憤氣填膺耳開成元年正月辛丑帝常服御宣政殿受朝賀遂宣詔大赦天下改元乙巳上御紫宸對宰臣李石奏曰陛下改元御殿人情大悅全放京兆一年租賦又停四節奏奉恩澤所該實當要切帝曰朕務行其實不欲崇長空文石曰赦書須內留一本陛下時看之又十道黜陟使發日更付與公事根本令向外與長吏詳擇施行方盡利害之要矣二年三月戊辰夜彗長八丈有餘西北行東指在張十四度壬申詔曰朕嗣守丕

構對越上天虔恭寅畏於今一紀何嘗不宵衣念道是
食思術師周文之小心慕易乾之夕惕懼德不類貽列
聖羞將欲俗致和平時無殃咎然誠未格物謫見於天
仰愧三靈俯慚庶彙思獲攸濟浩無津涯昔宋景發言
星因退舍魯僖納諫饑不害人取鑒往賢深惟自勵載
軫在予之責宜降恤辜之恩式表殷憂冀荅昭誠天下
死罪降從流流已下並釋放三年九月上以皇太子慢
遊敗度欲廢之中丞狄兼謨垂涕切諫是夜移太子於

少陽院殺太子宮人左右數十人十月皇太子薨於少陽院謚曰莊恪十一月己卯夜彗孛東西竟壬戌詔曰上天蓋高感應必由乎人事寰宇雖廣理亂盡繫乎君心從古以來必然之義朕嗣膺寶位十有三年常克已以處恭每推誠於衆庶將以導迎休應漸致緝熙期克荷於宗祧思保寧於華夏而德有所未至信有所未孚災氣上騰天文譎見再周朞月重擾星躔當始復之時觀垂象之變兢兢懼惕厲若臨泉谷是用舉成湯之六

事念宋景之一言詳求遣咎之端采聽銷禳之術必有
精理蘊於衆情冀屈法以安人爰恤刑而厚下應犯死
罪並降從流流已下遞降一等五年春正月戊寅上不
康不受朝賀辛巳崩於大明宮之太和殿謚曰元聖昭
獻皇帝廟號文宗葬章陵

武宗昭肅皇帝

唐書曰武宗昭肅皇帝諱炎穆宗第五子也母曰宣懿
皇后韋氏元和九年六月十三日生於東宮長慶元年

三月封潁王本名瀍初文宗追悔莊恪太子殂不由道乃以敬宗子成王陳美為皇太子開成四年冬十月宣制未遑冊禮五年正月文宗暴疾宰相李珣樞密劉弘逸奉密旨以皇太子監國兩軍中尉仇士良魚弘志矯詔迎潁王於十六宅曰朕自嬰疾疹有加無瘳懼不能躬總萬機日登庶政稽于古訓謀及大臣用建親賢以貳神器親弟潁王瀍昔在藩邸與朕常同師訓動成儀矩性稟寬仁俾奉昌圖必諧人欲可立為太弟一應軍

國政事便令權勾當百辟卿士中外庶臣宜竭乃心輔
成予志成王陳美先立為皇太子以其年尚幼冲未漸
師資比日重難不遑冊命回踐藩邸式協至公可復封
陳王四日文宗崩宣遺詔皇太弟宜於柩前即皇帝位
宰臣楊嗣復攝冢宰十四日受冊於正殿年二十七二
月制穆宗妃韋氏追謚宣懿皇太后帝之母也上御正
殿宣降德音以開府右軍中尉仇士良封楚國公左軍
中尉魚志弘為韓國公太常卿崔郾戶部尚書判度支

崔珙並本官同中書門下平章事帝在藩邸時頗好道術脩攝之事是秋召道士趙歸真八十一人於禁中三殿脩金籙道場乃幸三殿於九天壇親受法籙左拾遺王哲上疏言王業之初不宜崇信異端疏奏不省會昌元年正月庚戌有事於南郊禮畢御丹鳳樓大赦天下改元二月以淮南節度使李紳為中書侍郎同平章事二年四月司空平章事李德裕等上章請加尊號曰仁聖文武至聖大孝皇帝戊寅御宣政殿受冊八月回鶻

烏介可汗過天德至杞頭峰北俘掠雲朔北川詔劉沔
出師守鴈門諸闖回鶻首領屈武降幽王授左武衛將
軍詔以回鶻犯邊漸侵內地或攻或守於理何安令少
師牛僧孺陳夷行與公卿等議可否以聞僧孺曰今百
寮議狀以固守闕防俟其可擊則用兵宰相李德裕議
回鶻所恃者嗚沒赤心耳今已離叛其強弱之勢可見
戎人獷悍不顧成敗以失二將乘忽入侵出師急擊破
之必矣怙險示弱虜無由退擊之為便天子以為然乃

徵發許汴滑等六鎮之師以太原節度使劉沔為回鶻
南面招討使以張仲武為幽州盧龍節度使充回鶻東
面招討使以李思忠為回鶻西南面招討使皆會軍於
太原十月幸涇陽校獵白鹿原諫議大夫高少逸鄭朗
等於閣內論陛下校獵太頻出城稍遠萬機廢弛晨出
夜歸方用兵師且宜停止上優答之諫官出上謂宰臣
曰諫官甚要朕時聞其言庶幾減過三年春正月以宿
師於野罷元會二月太原劉沔奏至大同軍遣石雄襲

回鶻牙帳大敗回鶻於殺胡山其烏介可汗被創而走
已迎得太和公主至雲州是日御宣政殿百寮稱賀三
月太和公主至京師百官班於章敬寺迎謁仍令所司
告憲宗穆宗二室四月昭義節度使劉從諫卒軍中以
從諫姪稹為兵馬留後上表請授節度使遣中使賫詔
路府令稹護從諫之喪歸洛陽稹拒朝旨尋以成德軍
節度使王元逵魏博節度使何弘敬並以本官充招討
澤潞使四年三月以道士趙歸真為左右街道門教授

先生時帝志學神仙師歸真歸真乘寵每排毀釋氏言
非中國之教蠹耗生靈宜盡除去帝頗信之七月王元
逵奏邢州刺史裴問別將高元武以城降潞州刺史王
釗磁州刺史安玉皆以城降何弘敬山東三州平潞州
大將郭誼張谷陳湯廷遣人至王宰軍請殺劉稹以自
贖王宰以聞乃詔雄率軍三千入潞州郭誼斬劉稹首
以迎雄澤潞五州平八月王宰傳稹首與大將郭誼等
一百五十露布獻於京師上御安福門受俘百寮樓下

稱賀十月車駕幸鄴縣十一月幸雲陽五年正月宰臣
李德裕杜棕等率文武百寮上徽號曰仁聖文武章天
神功盛德明道皇帝乙亥有事於郊廟禮畢御承天門
大赦天下秋七月庚子勅吏毀天下佛寺四千六百餘
所還俗僧尼二十六萬五百人收充兩稅戶招提蘭若
四萬餘所收膏腴上田數千萬頃收奴婢為兩稅戶十
五萬人六年三月壬寅上不豫制改御名曰炎帝重方
士頗服食修攝親授法籙至是藥躁喜怒失常既篤旬

不能言宰相李德裕等請見不許中外莫知安否人情危懼是月二十三日宣遺詔以皇太叔光王柩前即位是日崩年三十三謚曰至道昭肅孝皇帝廟號武宗葬端陵

宣宗獻文皇帝

唐書曰宣宗獻文皇帝諱忱憲宗第十三子母曰孝明皇后鄭氏元和五年六月生于大明宮長慶元年三月封光王名怡會昌六年三月武宗疾篤宣遺詔立為皇

太叔權勾當軍國政事畢翌日即帝位時年三十七帝
外晦而內明嚴重寡言視瞻特異幼時宮中以為不慧
十餘歲時遇重疾沉緘忽有光輝燭身蹙然而興正身
拱揖如對臣寮妃媼以為心疾穆宗往視之撫其背曰
此吾家英物非心憊也賜以玉如意御烏金帶嘗夢乘
龍上天言之於鄭太后乃止曰不宜人知母幸勿復言
歷太和會昌朝愈事韜晦羣居游處未嘗有言文宗武
宗幸十六宅宴集強誘其言以為戲笑謂之光叔武宗

遇之尤不以禮及監國之日哀毀滿容接待羣寮決斷庶務人方見其隱德焉四月辛未釋服尊母鄭氏曰皇太后以兵部侍郎翰林學士承旨白敏中同中書門下平章事大中元年正月有事於郊廟禮畢御丹鳳樓大赦改元帝雅好儒士留心貢舉有時微行人間採聽輿論以觀選士之得失每山池曲宴與學士詩屬和公卿出鎮亦賦詩餞行凡對臣寮肅然拱揖鮮有輕易之意大臣獻章疏必燒香盥手受而覽之故當時以大中之

政有貞觀之風焉閏三月勅會昌季年併省寺宇雖云
異方之教無損為理之原中國之人久行其道釐革過
當事體未弘其靈山勝境天下州府應會昌五年四月
所廢寺宇如有宿舊名僧復能脩創一任住持所由不
得禁止七月太子少保分司東都衛國公李德裕為人
所訟貶潮州司馬外置二年春正月宰相率文武百寮
上徽號曰聖敬文思和武光孝皇帝御宣政殿受冊三
年春正月涇原節度康季滌奏吐蕃宰相倫恐熱以秦

原樂安三州及石門等七關之兵民歸國詔太僕卿陸
耽往諭旨仍令靈武節度使朱叔明邠寧節度使張景
緒各出本道兵馬應接六月康季榮奏收復原州城及
石門驛葺木峽制勝六盤石峽等六關訖邠寧張景緒
奏收復蕭關勅於蕭關置武州改樂安為威州七月三
州七關軍人百姓皆河隴遺黎數千人見于闐下御延
喜門撫慰令其解辮賜之冠帶共賜絹十五萬疋八月
鳳翔節度使李玘奏收復秦州制曰自昔皇王之有國

也何嘗不文以守成武以集事叅諸二柄歸于大寧朕
猥荷丕圖思弘景運憂勤戒惕四載于茲每念河湟土
疆綿亘遐闊洎天寶末犬戎乘我多難無方禦姦遂從
腥羶不遠京邑事更十葉時近百年進士試能靡不竭
其長策朝廷下議皆亦聽其直詞盡以不生邊事為永
圖且守舊地為明理在苒於是收復無由今者天地儲
祥祖宗垂祐左衽輸欵邊壘連降刷恥建功所謀必克
實賴樞衡妙筭將師雄威副元玄不爭之文絕漢武遠

征之悔甌脫頓空於內地斥堠全據於新封莫大之休
指期而就况將士等櫛沐風雨暴露郊原披荆榛而刀
斗夜嚴逐豺狼而穹廬曉破動皆如意古無與京念此
誠勤宜加寵賞涇原宜賜絹六萬疋靈武五萬疋鳳翔
邠寧各賜四萬疋嗚呼七關要害三都膏腴候館之殘
恥可尋唐人之遺風尚在追懷往事良用興嗟夫取不
在廣貴保其金湯得必有時詎計於遲速今則便務脩
築不進干戈必使足食足兵有備無患載洽愛育之道

永置生靈之安中外臣寮宜體朕意十二月追謚順
宗曰至德大聖大安孝皇帝憲宗曰昭文章武大
聖孝皇帝初以河湟收復百寮請加徽號帝曰河湟
收復繼成先志朕欲追尊祖宗以昭功烈白敏中等
對曰非臣等愚昧所能及至是上御宣政殿行事及
冊出上俯僂自送流涕嗚咽四年春正月以追尊二
聖御正殿大赦天下五年八月河州刺史張義潮遣
兄義澤以瓜沙伊肅等十一州戶口來獻自河隴

陷蕃百餘年至是悉復隴右故地八年正月陝州黃
河清二月南蠻進犀牛詔還之十一年九月右補闕
陳瑕左拾遺王譜右拾遺薛廷傑上疏諫遣中使往
羅浮山迎軒轅先生上曰朕以萬幾事繁躬親庶務
訪聞羅浮山處士軒轅集善能攝生延齡益壽乃遣
使迎之或冀有少保理也朕每觀前史見秦皇漢武
為方士所惑常以之為誡卿等位當補闕職在諫
司閱示來章深納誠意仍謂崔慎由曰為吾言於諫

官雖少翁樂大復生不能相惑如聞軒轅生高士欲與
之一言耳十二年春正月羅浮山人軒轅集至京師上
召入禁中謂曰先生遐壽而長生可致乎曰徹聲色去
滋味哀樂如一德施周給自然與天地合德日月齊明
何必別求長生耶畱之月餘堅求還山十三年五月上
不豫月餘不能視朝八月宣遺詔立鄆王爲皇太子勾
當軍國事是日崩于大明宮聖壽五十謚曰聖武獻文
孝皇帝廟號宣宗葬貞陵

懿宗恭惠皇帝

唐書曰懿宗恭惠皇帝諱淮宣宗長子母曰元昭皇太后晁氏大和七年十一月生於藩邸會昌六年十月封鄆王本名溫大中十三年八月遺詔立爲皇太子監國改今名十三日即帝位時年二十七帝姿貌魁傑有異稠人藩邸時嘗經重疾郭淑妃侍醫藥見黃龍出入於卧内既間妃以異告帝曰慎勿復言又嘗大雪數尺而帝寢室之上獨無人皆異之宣宗製秦邊陲樂曲詞有

海嶽晏咸通之句又大中末京城小兒疊布漬水紐之
向日謂之投暈帝果以鄆王即大位以咸通爲年號九
月釋服追尊母后晁氏爲太后謚曰元昭咸通元年春
正月上御紫宸殿受朝十一月丁未有事於郊廟禮畢
御丹鳳樓大赦改元二年九月林邑蠻寇安南府遣神
策將軍康承訓率禁軍及江西湖南之兵赴援三年春
正月左僕射門下侍郎平章事杜悰率百寮上徽號曰
睿文明聖孝德皇帝四年春正月庚午有事于圜丘禮

畢御丹鳳門大赦五年四月南蠻寇邕管以秦州經畧
使高駢率禁軍五千赴邕管會諸道之師禦之五月制
曰朕以寡昧獲承高祖太宗之丕構六載於茲矣罔敢
遊是娛罔聲色是縱罔刑戮是濫罔邪佞是惑蚤夜悚
惕以憂以勤庶幾乎八表用康兆人以泰而西戎款附
北狄懷柔獨唯南蠻奸宄不率侵陷交趾突犯邊陲爰
及雋州亦用攘寇勞我士卒興吾甲兵騷動黎元役力
飛輓每一軫念憫然疚懷顧惟生人罹此愁苦宜布自

天之澤俾垂及物之仁如聞湖廣桂州是嶺路係口諸道兵馬綱運無不經過頓遞供承動多差配彫傷轉甚宜有特恩應澤桂兩道各賜錢三萬貫以助軍錢以充館驛息利本錢其江陵江西鄂州三道比於澤桂徭配稍簡宜令本道觀察使詳具間劇准此例與直本錢黎雋等州因蠻寇殺傷宜令本道收拾埋瘞六年秋高駢自海門進軍破蠻軍收復安南府自李琢失利交趾陷沒十年蠻軍北寇邕界人不聊生至是方復故地七

年十月安南都護高駢奏蠻寇悉平十一月御宣政殿
大赦以復安南故地九年七月徐州赴桂林戍卒五百
人官軍許佶趙可立殺其主將王仲甫以糧料判官龐
勛爲都頭剽掠湘潭衡山兩縣有衆千人擅還本鎮九
月甲午龐勛陷宿州知州判官焦璐奔歸于徐乙未龐
勛陷徐州十年九月賊宿州守將張玄稔以城降有兵
萬人馬舉率兵赴之龐勛聞之以其衆將攻玄稔玄稔
賊之勁將也遂與舉合勢急圍徐州許佶登城拒守者

三日佶敗出走稔收復徐州龐勛方來赴援聞城已破
欲南趨濠州馬舉追及渙河擊敗之勛溺水而死蕭縣
主將又斬許佶首來降徐寇悉平十一月南詔蠻驃信
坦綽酋龍率衆二萬寇雋州十二月勅荆南節度使杜
崇禦之據司天奏有小孛星氣經歷分野恐有外夷兵
水之患緣邊藩鎮最要隄防宜訓習師徒增築城堡凡
關制置以共事聞十一年八月同昌公主薨追贈衛國
公主謚曰文懿主郭淑妃所生上尤鍾念悲惜異常以

待詔韓宗紹等醫藥不効殺之收捕其親族三百餘人
繫京兆府宰相劉瞻京兆尹溫璋上疏論諫行法太過
上怒十二年春正月宰相路巖率文武百寮上徽號曰
睿文英武明德至仁大聖廣孝皇帝御含元殿受冊畢
大赦五月庚申勅慎恤刑獄大易格言詔曰如得其
情則哀矜而勿喜而獄吏苛刻務在舞文守臣因循罕
聞視事以此械繫之輩溢於狴牢追捕之徒繫於簡牘
實傷和氣用致沴氛况時屬煇蒸化先茂育並赦罪戾

式順生成應天下所禁繫罪人除十惡五逆故意殺人
外餘並宜疎理釋放十四年六月帝不豫七月戊寅疾
大漸制立晉王儼爲皇太子權勾當軍國政事辛巳遺
詔曰皇太子儼性稟寬和生知忠孝德包睿哲聖表徇
齊必能揚祖宗之重光荷邦家之丕構宜令所司具禮
於柩前即皇帝位是日崩於咸寧殿聖壽四十一謚曰
睿文昭聖恭惠孝皇帝廟號懿宗葬于簡陵

太平御覽卷一百十五

欽定四庫全書

太平御覽卷一百十六

宋 李昉等 撰

皇王部四十一

唐僖宗恭定皇帝

黃巢

附

昭宗景文皇帝

哀帝

僖宗恭定皇帝

唐書曰僖宗恭定皇帝諱儼懿宗第五子母曰惠安皇

后王氏咸通三年五月生於東宮初封晉王名儼十四
年十月懿宗疾大漸其月十八日制曰朕守大器之重
居兆人之上日慎一日如履如臨旣勞懷寢興思理
涉道猶淺導化未孚而攝養乖方寒暑成厲實有慮於
闕政且無暇於怡神竟未少瘳日加寢劇萬務煩撻須
有主張爰考舊章謀於卿士思闡鴻業式建皇儲第五
男晉王儼改名儼孝敬溫恭寬和博厚日新令德天假
英姿言皆中規動必由禮俾崇邦本允叶人心宜令為

皇太子權勾當軍國政事咨爾羣公卿士洎于腹心之
臣敬保元子輔成予志各竭乃心以安黎庶是日懿宗
崩即皇帝位于柩前年十二左軍中尉劉行深右軍中
尉韓文約居中執軍政並封國公八月皇帝釋服冊聖
母王氏為皇太后河南大水九月守司空門下侍郎平
章事韋保衡賤賀州刺史乾符元年十一月庚寅上有
事於郊廟禮畢御丹鳳門大赦改元二年春正月己丑
宰相崔彥昭率文武百官上尊號上御正殿受冊四月

海賊王郢攻剽浙西郡邑五月濮州賊首王仙芝聚徒於長垣縣其衆三千進陷濮州俘丁壯萬人鄆州節度使李種出兵擊之為賊所敗二年七月王仙芝寇掠河南十五州其衆數萬是月賊逼潁許攻汝州下之四年三月寇句賊黃巢衆萬人攻鄆州陷之七月黃巢泊浙海其徒數萬趨潁蔡入查牙山遂與王仙芝合七月賊陷隨州五年三月王仙芝餘黨攻江西招討使宋威出軍屢敗之仍宣詔書招之仙芝致書於威求節鉞威偽

許之仙芝令其大將尚君長蔡溫玉奉表入朝威乃斬
君長溫玉以徇仙芝怒急攻洪州陷其郭宋威赴援與
賊戰大敗之殺仙芝傳首京師廣明元年春正月乙卯
朔上御宣政殿改元二月黃巢自衡永州下頓陷湖南
江西屬郡三月黃巢尚讓等攻鄂州陷江西饒信等十
五州七月渡江寇淮南十月仍悉衆渡淮巢自號率土
大將軍其衆富足自淮已北整衆而行不剽財貨唯驅
丁壯為兵十一月陷東都畱守劉允章率分司官屬迎

謁之賊供頓而去坊市晏然壬申臨虢州丙子犯潼關
守關諸將望風自潰十二月辛巳賊據潼關時左軍中
尉田令孜專政宰相盧攜曲事之相與誤謀以致傾敗令孜
恐衆罪加已請貶攜官命學士王徽裴徹為相甲申宣
制以戶部侍郎翰林院學士王徽裴徹同平章事貶右
僕射門下侍郎平章事盧攜為太子賓客攜聞賊至仰
藥而死是日上與諸王后妃數百騎自子城由含元殿
出金光門幸山南文武百寮並不之知無從行者京城

晏然是日晡晚賊入京城時右驍衛大將軍張直方率
武官十餘迎黃巢於坡頭壬辰黃巢僭位偽號大齊稱
皇帝年號金統悉陳文物據丹鳳門偽赦中和元年春
正月車駕在興元六月車駕幸成都府西川節度使陳
敬瑄自來迎奉七月乙卯車駕至西蜀丁巳御成都府改
廣明二年為中和元年大赦天下二年春正月天下勤
王之師雲會京師賊食盡食樹皮以金玉買人於行營
之中人獲數百萬山谷避亂百姓多為諸軍之所執賣

八月庚子賊同州防禦使朱溫殺其監軍嚴實大將胡
真謝曠等來降王鐸承制拜溫華州刺史三年四月庚
子沙陁忠武義成義武等軍援長安賊悉衆拒之於渭
橋大敗而還李克用乘勝追之己卯黃巢收其殘衆由
藍田關而遁庚辰收京城天下行營司馬都監楊復光
上章告捷行在四年七月癸酉賊將林言斬黃巢黃揆
黃秉三人首級降時溥初徐將李師悅與賊戰于瑕丘
賊殊死戰其衆殆盡林言與巢走至太山狼虎谷之襄

王村懼追至併命乃斬賊降師悅壬午捷書至行在十
二月丁亥朔大明宮留守王徽與留司百官上表請車
駕還宮詔以來年正月還京兆啓元元年春正月車駕
在成都府己卯還京二月丁卯車駕至京師御宣政殿
大赦改元時李昌符據鳳翔王重榮據蒲陝諸葛爽據
河陽洛陽孟方正據邢洺李克用據太原上黨朱全忠
據汴滑秦宗權據許蔡時溥據徐泗朱瑄據鄆齊曹濮
王敬武據淄青高駢據淮南八州秦彥據宣歙劉漢宏

據浙東皆自擅兵賦遞相吞噬朝廷不能制江漢轉運路絕兩河江淮賦不上供但歲時獻奉而已國命所能制者河西山南劔南嶺西南道數十州大約郡將自擅常賦殆絕藩侯廢置不自朝廷王業於是蕩然五月宰臣蕭遘率文武百寮上徽號曰至德光烈孝皇帝御宣政殿受冊大赦十二月乙亥沙陀逼京師田令孜奉僖宗出幸鳳翔初黃巢據京師九衢三內宮室宛然及諸道兵破賊爭貨相攻縱火焚剽宮殿居屋市里十焚六

七賊平之後令京兆尹王徽經年補葺僅獲安堵至是
亂兵復焚宮闕蕭條鞠為茂草矣二年春正月車駕在
鳳翔李克用旋師河中與朱玫王重榮同上表請駕駐
蹕鳳翔仍數田令孜之罪乃以飛龍使楊復恭知內樞
密事戊子田令孜迫乘輿請幸興元庚申車駕幸寶雞
授刑部尚書孔緯兼御史大夫令率從官赴行在時車
駕夜出宰相蕭遘裴徹鄭昌國及文武官寮不知扈從
不及故令孔緯促之蕭遘惡令孜弄權再亂京國因郃

州奏事判官李松年至鳳翔乃令亟召朱玫迎奉癸巳
朱玫別領步騎五千至鳳翔令攷聞邠州軍至奉帝入
大散關令禁軍守靈壁玫至禁軍潰散遂長驅追駕至
尊途驛嗣襄王煜疾為玫所得時興元節度使石君涉
聞車駕入關乃毀撤棧道柵絕險要車駕由他道僅達
為邠州軍踵后崎嶇危殆者數四月壬子朱玫李昌言
迫宰相蕭遘等於鳳翔驛舍請嗣襄王煜權監軍國事
玫自為大丞相兼左右神策十軍軍容使遂驅率文武

百寮奉襄王還京師五月庚辰襄王僭即皇帝位年號
建貞十二月朱玟將王行瑜受密詔自鳳州率衆還長
安辛酉行瑜斬朱玟及其黨與數百人縱兵大掠是冬
苦寒九衢積雪兵入之夜寒冽尤劇民吏剝剝之后僵
凍而死者蔽地百官奉襄王奔河中王重榮給稱迎奉
執焜斬之文德元年春正月車駕發鳳翔祭賊孫儒斬
秦彥畢師鐸於高郵二月壬午車駕至京師戊子御承
天門大赦改元宰臣韋昭度率文武百寮上徽號曰聖

文睿德光武弘孝皇帝三月戊戌朔御正殿受冊庚子
上暴疾不康壬寅大漸癸卯立親弟壽王傑為皇太弟
勾當軍國事是夕崩於武德殿壽二十七謚曰惠聖恭
定孝皇帝廟號僖宗葬靖陵

黃巢

唐書曰黃巢曹州冤句人本以販鹽為事乾符中仍歲
凶荒人飢為盜河南尤甚初里人王仙芝尚君長聚盜
徒於濮陽攻剽城邑陷曹濮及鄆州詔左金吾衛上將

軍齊克讓為兖州節度使以本軍討仙芝仙芝懼引衆
歷陳許襄鄧無少長皆虜之衆號三十萬三年七月陷
江陵十月又遣將徐唐昌陷洪州時仙芝表請符不許
以神策統軍節度使宋威為荆南節度招討使中使楊
復光為監軍復光遣判官吳彥弘諭以朝旨釋罪別加
官爵仙芝乃令尚君長詣闕請罪且求恩命時宋威害
復光之成功禽送闕斬之賊怒悉衆擊官軍威軍大敗
復光收其餘衆以統之朝廷以王鐸代為招討五年八

月收復荊州斬仙芝首獻於闕下先是君長弟讓以兄奉使見誅率部衆入查牙山巢弟揆昆弟八人率盜千數依讓月餘衆至數萬陷汝州大掠關東官軍加討屢為所敗其衆十餘萬尚讓乃與羣盜推巢為主曰衝天大將軍署官屬藩鎮不能制時天下承平日久人不知兵僖宗以幼主臨朝號令出於臣下巢馳檄四方章奏論列皆指朝政之弊巢徒黨既盛與仙芝為引援及仙芝敗東攻亳州不下乃襲破沂州據之仙芝餘黨悉附

馬時王鐸緩於攻取高駢鎮淮南求請招討賊許之及
巢渡淮偽降於駢遣將張璘率兵受降於天長鎮巢禽
璘殺之因虜其衆尋南陷湖湘遂據交廣托越州觀察
使崔穆奏乞天平軍節度朝議不允又自求乞安南都
護廣州節度亦不允是歲自春及夏其衆大疫死者十
三四衆勸請北歸以圖大利廣明元年北踰五嶺犯湖
湘江浙進逼廣陵高駢閉門自固所過鎮戍望風降賊
九月渡淮十一月陷洛陽繼攻陝虢逼潼關陷華州留

將奮鈴守之朝廷以田令孜率神策博野等軍十萬守潼關關之左有谷可通行人平時禁人出入謂之禁谷及賊至官軍但守潼關不妨禁谷尚讓林言率前鋒田禁谷而入夾攻潼關官軍大潰博野都徑還京師燔掠西市十二月三日僖宗夜自開遠門出趨駱谷四日賊至昭應五日陷京師時巢衆累時為盜行伍不勝其富遇窮民於路爭行施遺既入闔門坊市聚觀尚讓慰曉市人曰黃王為生靈不似李家不惜汝輩但各安家業

賊衆競投物遺人十三日巢僭位國號大齊仍御樓赦
且陳符命曰唐帝知朕起義改元廣明以文字言之唐
已無天分矣唐去丑口而安黃天令黃在唐下乃黃家
日月也土生金子以金生宜改年為金統中和元年二
月尚讓寇鳳翔鄭畋出師禦之大敗賊於龍尾坡畋乃
馳檄告諭天下藩鎮四月涇原行軍唐弘夫之師屯渭
北河中王重榮之師屯沙苑易定王處存之師屯渭北
橋廊延拓拔思恭之師屯武功鳳翔鄭畋之師屯藍屋

六月邠寧朱玟之師屯興平忠武之師三千屯武功是歲勤王之師四面俱會十二月宰臣王鐸率荆襄之師自行在至鄭畋帳下小校竇玟者驍敢無敵每夜率敢死之士直入京師放火燔諸門斬首級而還賊大悚駭二年王處存合忠武之師敗賊將尚讓乘勝收復京師賊遁去處存不為備是夜復為賊寇襲官軍不利九月賊將同州刺史朱溫降王重榮十二月李克用率代北之師自夏陽渡河屯沙苑三年春正月敗黃揆於沙苑

進營乾坑二年尚讓率衆十萬援華州克用合河中易
定武之師戰於梁田坡大敗賊軍俘斬數萬乘勝攻華
州塹柵以還之黃揆棄華州官軍收城四月八日克用
合忠武騎將寵從遇賊於渭南決戰三捷大敗賊軍十
月夜巢黨散走詰旦克用收京師巢賊出藍田七盤路
東走關東五月巢賊先鋒將孟楷攻蔡州節度使秦宗
權稱臣於賊遂攻陳許營於澱水陳州刺史趙犇敗賊
前鋒生擒孟楷斬之巢乃悉衆攻陳州於是自唐鄧許

汝孟洛鄭汴曹濮徐兗數十州畢罹其毒賊圍陳郡三百日關東仍歲無耕稼人餓倚墻壁間賊俘人而食趙犖求援於太原四年三月李克用率山西諸軍由蒲陝濟河會關東諸侯赴援陳州三月諸侯之師復集四月官軍敗賊於太原俘斬萬計收其四壁又敗賊將黃鄴於華西收其壁巢敗大恐收軍營於故陽里官軍進攻之五月大雨震電平地水深三尺壞賊壘賊自離散復聚於尉氏逼中牟翌日營汴水北是夜復大雨震雷溝

滕漲溢賊分寇汴州李克用自鄭州引軍襲擊大敗之
賊衆保胙縣官軍追討賊無所保其將李謹降于大梁
尚讓率部下人歸時溥賊自相猜間相殺於營州所殘
者千人中夜遁去克用追擊至濟陰而旋賊散於兗鄆
界黃巢入太山徐帥時溥遣將張友與尚讓之衆掩捕
之至狼虎谷巢將林言斬巢及二弟鄴揆等七人首并
其妻子函送徐州

昭宗景文皇帝

唐書曰昭宗景文皇帝諱暉懿宗第七子母曰惠安太后王氏以咸通八年三月生於東內十三年封壽王名傑乾符四年授開府儀同三司幽州大都督幽州盧龍等軍節度使帝於僖宗母弟也尤相親睦自艱難播越嘗隨侍左右文德元年二月僖宗暴不豫初復宮闈人心傾矚遽聞被疾軍民駭愕及大漸之夕未知所立軍容楊復恭請以壽王監國遺詔立為皇太弟柩前即帝位時年二十二以司空韋昭度攝冢宰己丑見羣臣

始聽政帝攻書好文尤重儒術神氣雄俊有會昌之遺
風以先朝威武不振國命寢微而尊禮大臣詳延道術
意在恢張舊業號令天下即位之始中外稱之四月庚
午追謚聖母惠安太后曰恭獻龍紀元年春正月上御
武德殿受朝賀大赦改元文武臣寮進秩頒爵有差五
月漢州刺史王建陷城都府遷陳敬瑄於雅州建自稱
西川兵馬留後用田令孜為監軍十一月己丑朔將有
事於園兵改名曰擘辛亥上宿齋於武德殿甲寅園丘

禮畢御承天門大赦大順元年春正月御武德殿受朝
賀宰臣百寮上徽號曰聖文睿德文武弘孝皇帝禮畢
大赦改元乾寧元年春正月上御武德殿受朝賀大赦
改元二年五月甲子李茂真王行瑜韓建等各率精甲
數千人入覲京師大駭人皆亡竄吏不能止帝御安福
門以待之三帥既至拜舞樓下帝臨軒喻之曰卿等藩
侯宜存臣節稱兵入朝不申奏請意在何也茂真行瑜
汗流洽背不能對唯韓建陳叙入覲之由上並召昇樓

賜卮酒宴於同文殿茂貞行瑜極言南北司相傾深寤時政請誅其太甚者乃貶宰相韋昭受李谿尋殺之殺內官數人而去王行瑜留弟行約茂貞留假子闔圭各以兵三千人宿衛時三帥同謀廢帝立吉王聞太原起軍乃止留兵宿衛而還七月李克用舉軍渡河以討王行瑜李茂貞韓建等庚申同州節度使王行實棄郡入京師謂兩軍中尉駱金瓘劉景宣曰沙陁十萬至矣請理車駕幸邠州且有城守時景宣附鳳翔癸亥夜闔圭

與劉景宣子繼成同州王文實縱火剽東市脅上出幸
上聞亂登承天門遣諸王率禁兵禦之捧日都頭李筠
率本軍侍衛樓前閫士以鳳翔之卒攻李筠矢及御座
之樓扉上懼下樓與親王公主內人數百幸永興坊李
筠軍扈蹕都頭李君實以兵繼至乃與筠兩都兵士侍
衛出啓夏門憇於華嚴寺以俟內人繼至其日晚幸沙
城鎮京師士庶從幸者數十萬北至南山谷口渴死三
之一至暮為盜寇掠慟哭之聲殷動山谷信宿宰相徐彥

若王搏崔胤三人至乃移幸石門鎮之佛宮乃令知樞
密劉先裕薛王知柔歸京師令置禁軍以備宮禁丙寅
李克用遣牙將閻諤奉表奔問秦屯軍河中俟上進發
赴邠州丁卯上遣內官張承業傳詔克用軍便令監太
原行營兵馬發赴新平又令內官郝廷立傳詔涇州令
張璠起涇原之師會克用軍上在南山半月餘克用仍
在河中未至渭北上懼鳳翔兵士劫遷乃令延王將御
服鞍馬玉器至河中宣諭八月李克用遣子存貞奉表

行在請車駕還宮辛亥車駕還宮三年六月鳳翔軍犯
京畿單王拒之於婁館接戰不利七月岐軍過京師諸
王率禁兵奉車駕將幸太原癸巳次渭北華州韓建遣
子充奉表起居請駐蹕華州乙未次下邳丙申駐蹕華
州時岐軍犯京師宮室廩閉鞠為灰燼光化元年八月
車駕自華還京師御端門大赦改元三年十一月左右
軍中尉劉季述王仲先廢帝幽於東內問安宮請皇太
子裕監國是日迎太子裕監國矯宣昭宗命稱上皇甲

午宣上皇制太子登皇帝位十二月癸未夜護駕孫昭
德周承誨等以兵攻劉季述王仲先攜其首詣東宮門
呼曰逆賊王仲先已斬首訖請陛下出宮慰諭兵士宮
人破鑰帝與后方得出天復元年正月昭宗反正登長
樂門樓受朝賀四月甲戌有事於宗廟是日御長樂門
大赦改元十月戊戌朱全忠引四鎮之師赴河中京師
聞之大恐民間亡竄山谷十一月中尉韓全誨與鳳翔
獲駕都將李繼徽奉車駕出幸鳳翔三年正月車駕至

鳳翔幸全忠軍全忠素服待罪泣下不自勝上親解玉帶賜之乙丑次扶風令朱友倫總兵侍衛丁卯次興平宰臣崔胤率百官迎謁戊辰次咸陽己巳入京師天子素服哭於太廟改服冕旒謁九廟禮畢御長樂樓大赦天祐元年正月全忠率師屯河中遣牙將寇彥卿奉表請車駕還洛陽全忠令長安居人按籍遷居撤屋木自渭浮河而下連裳號哭月餘不息秦人大罵於路曰國賊崔胤朱溫傾覆社稷俾我及此天乎天乎丁巳車駕

發京師癸亥次陝州全忠迎謁於路四月甲辰車駕由
徽安門入朱全忠張全義宰相裴樞獨孤損前導是日
大風雨上跣步不辨物色日晡稍止上謁太廟禮畢還
宮御宣正殿勞從官衛士乙巳上御元正殿大赦八月
壬寅夜朱全忠令朱友恭氏叔琮蔣玄暉弑帝於椒殿
帝自離長安日憂不測與皇后內人惟沉飲覺時年三
十八謚曰聖穆景文孝皇帝廟號昭宗葬和陵

哀帝

唐書曰哀帝諱祝昭宗第九子母曰積善太后何氏景福元年九月生乾寧四年封輝王改名祚天復三年拜開府儀同三司兼充諸道兵馬元帥天祐元年八月昭宗遇弒翌日蔣玄暉矯宣遺詔又昭宣皇太后令皇太子柩前即位二年四月甲辰夜等起河北貫文昌其長三丈在北方戊申全忠令知樞密王殷害皇太后何氏於積善宮四年二月禪位於梁全忠建國奉帝為濟陰王遷於曹州時太原幽州鳳翔西川統稱天祐正朔天

祐五年二月帝為全忠所害時年十七謚曰哀皇帝以
禮葬於陰縣之定陶鄉

太平御覽卷一百十六

欽定四庫全書

太平御覽卷一百十七

宋 李昉等 撰

偏霸部一

蜀先主

後主

先主

蜀志曰先主姓劉諱備字玄德涿州人漢景帝子中山靖王勝之後也勝子負元狩六年封涿縣陸城亭侯坐

耐金失侯因家焉

典畧云備本臨邑侯支屬

先主祖雄父弘世仕州

郡雄舉孝廉官至東郡范令先主少孤與母販履織席

為業舍東南角籬上有桑樹上高五尺餘遙望重重如

小車蓋往來者皆恠此樹非凡或謂當出貴人

漢晉春秋曰涿

人李定云此家必出貴人也

先主少時與宗中諸兒於樹下戲言吾

必當乘此羽葆蓋車叔父子敬曰汝勿妄語戒吾門也

年十五母使行學同宗劉德然遼西公孫瓚俱事故九

江太守同郡盧植德然父元起常資給先主與德然等

元起妻曰各有一家何能常爾耶起曰吾宗中有此兒
非常人也瓚深與先主相友瓚年長先主以兄事之先
主不甚樂讀書喜狗馬音樂美衣服身長七尺五寸垂
臂下膝顧自見耳少言語善下人喜怒不形于色好交
結豪俠年少爭附之中山大商張世平撫雙等皆累千
金販馬周旋於涿郡見而異之乃多與之金財先主由
是得用合徒衆靈帝末黃巾起州郡各舉義兵先主率
其屬從校尉鄒靖討賊有功除安喜尉大將軍何進遣

都尉毋丘毅詣丹陽募兵先主與俱行至下邳遇賊力戰有功除為下密丞復去官后為高唐尉遷為令為賊所破往奔公孫瓚表為別部司馬使為青州刺史田楷以拒冀州牧袁紹數有戰功試守平原令后領平原相郡民劉平素輕先主恥為之下使容刺之容不忍刺語之而去其得人心如此袁紹攻公孫瓚先主與田楷屯齊東曹公征徐州牧陶謙遣使告急於楷楷與先主俱救之時先主有兵千餘人謙以丹陽兵四千人益先主遂

去楷歸謙謙表先主為豫州刺史屯小沛謙病謂別駕糜竺曰非玄德不能安此州謙死竺帥州人迎先主先主未敢當下邳陳登謂先主曰今漢室凌遲海內傾覆立功立事在於今日彼州殷富戶口百萬欲屈使君撫臨州事北海相孔融謂先主曰今日之事百姓與能天與不取悔不可追先主遂領徐州袁術來攻先主先主拒之於盱眙淮陰曹公表先主為鎮東將軍封宜城亭侯是歲建安元年也先主與術相持經月呂布乘虛襲

下邳下邳守將曹豹反間迎布布虜先主妻子先主求和於布布還其妻子先主還小沛復合兵得萬餘人布惡之自出攻先主先主敗走歸曹公曹公厚遇之以為豫州牧曹公助先主圖布於下邳生擒布先主復得妻子從曹公還許表先主為左將軍禮之愈重出則同與坐則同席表術欲經徐州北就袁紹曹公遣先主督朱靈路招要擊術未至術病死曹公從容謂先主曰天下英雄唯使君與操耳本初之徒不足數也先主方食失

乙箸先主據下邳殺徐州刺史車胄留關雲長守下邳
自還小沛曹公東征先主敗績曹公盡收其衆虜先主
妻子并擒雲長以歸先主走青州青州刺史表譚先主
故茂才也將步騎迎先主先主隨譚到平原馳使白紹
紹遣將道路奉迎身去鄴二百里與先主相見雲長亡
歸先主曹公遣曹仁將騎擊先主先主還紹軍陰欲離
紹乃說紹南連荊州收劉表紹遣先主將本兵復至汝
南遣糜竺孫乾與劉表相聞表自郊迎以上賓待之先

主在荊州數年嘗於表坐起至廁見髀裏肉生慨然流涕還坐表恠問備曰平常身不離鞍髀肉皆消今不復騎髀裏肉生日月若馳老將至矣而功業不建是以悲耳一日徐庶謂先主曰諸葛孔明卧龍也將軍豈不欲見乎先主曰可與俱來庶曰此人可就見不可屈致也宜枉駕顧之由是先主遂詣其廬凡三往乃見之因屏人曰漢室傾頽奸臣竊命孤不度德量力欲信大義於天下而智術短淺遂用猖蹶然志猶未已君謂計將安

出亮曰自董卓以來豪傑並起跨州連郡者不可勝計
曹操比於袁紹則名微而衆寡然操遂能克紹以弱為
強者非唯天時抑亦人事今操已擁百萬之衆挾天子
以令諸侯此誠不可與爭鋒孫權據有江東已歷三
世國險而民附賢能為之用此可與為援而不可圖也
荊州北據漢沔利盡南海東連吳會西通巴蜀此用武
之國而其主不能守殆天所以資將軍將軍豈有意乎益州
險塞沃野千里天府之國高祖因之以成帝業劉璋暗弱張

魯在北民殷國富而不知存恤智能之士思得明君將
軍既帝室之胄信義著於四海總攬英雄思賢如渴若
跨有荆益保其巖阻西和諸戎南撫夷越外結孫權內
修政事天下有變則命一上將將荊州之軍以向宛洛
將軍身率益州之衆出於秦川百姓孰不簞食壺漿以
迎將軍者乎誠如是則霸業可成漢室可興矣先主曰
善於是與亮情好日密關張諸人等不悅先主解之曰
孤之有孔明如魚之有水也願諸君勿復言十二年曹

公北征烏丸先主說表襲許表不能用及曹公南征會
表死子琮代立遣使請降先主屯樊城遂將其衆去過
襄陽諸葛亮說先主攻琮有荊州先主曰劉荊州臨亡
託我以孤背信自濟死何面目見劉荊州乎吾不忍也
琮左右及荊州人多歸先主比到當陽衆且十萬輜重
數千兩日行十餘里或謂先主曰宜速行保江陵今雖
擁大衆被甲者少若曹公兵至何以拒之先主曰夫濟
大事者以人為本今人歸吾吾何忍棄去是時曹公又

以江陵有軍實恐先主據之乃釋輜重輕軍到襄陽聞先主已過曹公將精騎五千急追一日一夜行三百餘里及於當陽之長坂先主棄妻子與諸葛亮張飛趙雲等數十騎走遣諸葛亮自結於孫權權遣周瑜等助之與曹公戰於赤壁大破之焚其舟船羣下推先主為荊州牧治安益州牧劉璋內懷恐懼遣法正迎先主先主留諸葛亮雲長等據荊州將步卒數萬人入益州璋推先主行大司馬領司隸校尉先主亦推璋為鎮西大

將軍領益州牧璋勅關戍諸將文書勿復關通先主先
主大怒進圍成都數十日璋出降蜀中殷盛豐樂先主
置酒大饗士卒蜀城中金銀分與將士還其穀帛先主
復領益州牧羣下尊先主為漢中王還治成都魏文帝
稱尊號或傳聞漢帝見害先主乃發喪制服追謚曰孝
愍皇帝是後建立禮儀上尊號即皇帝位於成都章武
元年夏四月大赦改元永安三年先主病篤託孤於丞
相亮夏四月先主殂於永安宮時年六十三五月梓宮

自永安還成都謚曰昭烈皇帝秋八月葬惠陵

華陽國志曰漢末大亂雄傑並起若董卓呂布二袁韓馬張楊劉表之徒兼州重郡衆動萬計叱咤之間皆自謂漢祖可踵桓文易邁而魏武神武肆略戡屠盪盡於時先主名微衆鮮而能龍飛鳳舉假翼荆楚植基隴益建元復漢與之鼎峙非英才命世孰克如是

後主


蜀志曰後主諱禪字公嗣先主子也建安二十四年先

主為漢中王立為王太子即尊號為皇太子先主殂於永安宮後主襲位於成都時年十七是歲魏黃初四年也景耀六年夏魏大興徒眾命征西將軍鄧艾數道並攻用光祿大夫譙周策奉書於艾後主與櫬自縛詣壘門艾解縛焚櫬延請相見因奉制拜後主為驃騎將軍諸園守悉被後主勅然後降下艾使後主止其故宮身往造馬後主乃舉家東遷在位凡四十年既至洛陽冊命為安樂縣公食邑萬戶賜絹萬疋奴婢百人後司馬

文王與後主宴為之作故蜀技樂旁人皆為感愴而後
主喜笑自若王謂賈充曰人之無情乃至於是乎雖使
諸葛亮在亦不能輔之久全况姜維耶充曰不如是殿
下何由并之他日王問之曰頗思蜀否對曰此間樂不
思蜀也蜀故秘書令郤正聞之求見語之曰若王復問
可言先人墳墓遠在隴蜀乃心西悲無日不思因閉其
目會王復問具以此荅王曰何乃似郤正之語耶因驚
曰實如尊命左右皆大笑後薨於洛陽

魏畧曰蜀主在小沛不意曹公卒至迫遽棄家屬奔荊州後主時年數歲匿竄隨人西入漢中為人所賣及建安十六年關中破亂扶風人劉括避亂入漢中買得之問知其良家子遂養為子與娶婦生子始後主與父相失時識其父字立德比舍人有姓簡者及先主得益州簡為將軍嘗遣簡到漢中舍都邸後主詣簡簡相驗訊事皆符驗簡喜以語張魯魯乃沐浴送詣益州先主立為太子始先主以孔明為太子太傅及後主立以亮為

丞相委以諸務謂亮曰政由葛氏祭則寡人亮亦以後
主未嫻于政遂總內外



太平御覽卷一百十七